

Fundacion Museo Arubano:

Preparacionnan pa apertura di Museo di Industria ta bayendo segun un schedule bon organisa

ORANJESTAD - Fundacion Museo Arubano cu hopi orguyo a anuncia recientemente cu e apertura di e tan spera Museo di Industria lo ta tumando luga riba dia 12 di september proximo.

Un team grandi di profesional riba diferente nivel ta tras di e proyecto aki, cu ta cay bao di Fundacion Museo Arubano, FMA, cu e siman aki a cuminsa cu e instalacion di e exposicion cu materialnan, software y hardware, cu a wordo traha y/of adkiri tanto na Hulanda como na Aruba mes.

Director di FMA, Anky Vrolijk a splica durante di bishita di Minister di Cultura Otmar Oduber na e watertoren di San Nicolas, cu a wordo scogi como ubicacion di e museo, cu oficialmente a cuminsa hinca e materialnan for di Hulanda cu a yega Aruba for di siman pasa den e museo.

El a agrega cu un grupo di especialista for di Hulanda ta guiando e proceso y hincando tur e materialnan den otro. FMA a haya asistencia y conseho for di Opera Amsterdam pa cu e diseño di e museo, e materialnan a wordo traha pa Fiction Factory y e software y hardware a bin di un compania cu yama VHS.

E companianan Arubano Spark Electrical, Aruwood, Roadcap Construction, Freeway y Art & Design ta entre e grupo di partnernan local valioso cu ta participa na e realisacion di e museo.

Vrolijk a comenta cu FMA y tur partner ta hopi contento cu a yega na e fase aki, y e trabao den ekipo ta bayendo tremendamente bon. Tanto e directiva y trahadonan di FMA ta sumamente orguyoso di e museo cu ta poco, poco tumando forma, y nan ta sigur cu comunidad di Aruba tambe lo ta hopi orguyoso di e producto final. Rosetna Martinus, kende ta manager di e dos museonan cu lo habri proximamente na San Nicolas, esta Community Museum (den Nicolas Store) y Museum of Industry (den watertoren) a splica cu su funcion ta pa percura

pa e maneho, guia y pa tur cos na e museonan ta “up and running” pa e bishitantenan, como tambe pa e trahadonan.

Martinus tambe ta encarga cu percura pa tin eventonan y actividadnan unda cu tin oportunidad amplio pa e comunidad den su totalidad, incluyendo residentenan y bishitantenan di Aruba por

cera miho conoci cu e historia y cultura di Aruba en general.

El a agrega cu ya prome cu e museonan ta habri, FMA a organisa un evento comunitario, unda cu e invita habitantenan di e area, como tambe e comunidad di Aruba en general pa ricibi informacion di tur loke lo tin den e museo. E exposicion di

Museo di Industria ta uno moderno, y innovativo, cu ta atractivo sigur pa tanto e adulto como e mucha, e persona local, y e turista, y lo inclui diferente actividad special pa mantene tur persona interesa pa papia tocante di e atraccionnan y asina yuda den nan promocion, como tambe pa nan bishita e museo diferente bialha. □

